

Il pli interessant post tar Radio Rumantsch

Niculin Bezzola va en pensiun

DA LUCAS DEPLAZES/ANR

Contact cun ils Rumantschs en la Bassa

■ **«Il post da correspondent da Radio Rumantsch en la chasa federala a Berna è la pli bella ed la pli interessanta piazza che rtr po porscher.» Quai ha ditg spontanamain envers l'anr Niculin Bezzola che va per la fin da quest mais en pensiun.** Dapi l'onn 2003 rapporta Bezzola per ils auditurs ed las auditors dal Radio Rumantsch si da Berna. El haja adina empruvà d'intermediar quests cuntregns cumplitgads en ina furma che la gliued chapeschia da tge ch'i sa tracta e da svegliar l'interess per la politica da Berna, ha punctuà Bezzola. La differenza da far novitads a Berna ni a Cuira saja enorma.

L'infurmaziun per la medias en la chasa federala è voluminosa. Quasi mintga di datti conferenzas da pressa, comunicaziuns dal parlament, da l'administraziun federala, da las partidas politicas e dal cussegl federal. Il mantun d'infurmaziuns pretenda da selecziunar e da tschentar prioritads. Il post da redactor en la chasa federala pretenda bunas enconuschientschas da la politica naziunala e la sensibilitad da contactar las dretgas personas. Quai vul dir, tgirar in contact subtil cun ils parlamentararis e cun ils commembers dal cussegl federal e tuttina restar independents. Èn plinavant necessarias infurmaziuns detagliadas davart las singulas fatschentas ch'ins vul tractar e rapportar e 'last bad not least', autas cumpetenzas linguisticas en tut ils quatter linguatgs naziunals. Sin la dumonda da l'anr, tgenin saja propi stà in eveniment spezial durant sia activitad a Berna, ha Bezzola menziunà spontanmain: la tscherna da *Eveline Widmer-Schlumpf* sco cussegliera federala. «Per nus sco Grischuns è quai stà in eveniment immens.»

Niculin Bezzola ha er tgirà ils contacts cun las uniuns ed il chors rumantschs en la Bassa e rapportà davar lur activitads e novitads. Quella lavur al haja pussibilità blers contacts cun personas fitg interessantas. Rumantschas e Rumantschs datti gea dapertut en Svizra. Quai na saja betg adina stà simpel da chattar ils cumpatriots emigrads. Quest sector haja dentant pigiurà ils ultims onns, perquai che las uniuns tradiziunals dals Grischuns en la Bassa han fadia da chattar novs commembers. E tuttina spera Bezzola che Cuira cuntinueschia cun questa lavur.

Avant sia incumbensa da correspondent da rtr a Berna è stà occupà Bezzola ils onns 1996 fin 2002 tar la Direcziun generala SGR SSR a Berna. Là è el stà responsabel per ils projects dals radios da tuttas quatter regiuns linguisticas per l'Expo 02. Quai saja stà ina fasa fitg impurtanta. Dapi quest temp han ins cumenzà cun ina cooperaziun naziunala dals programs da radio tranter las quatter regiuns linguisticas.

Niculin Bezzola è naschì l'onn 1949 a Samedan. Suentar las scolas obligatorias ha el fatg il seminari da magisters a Cuira e dà scola a S-chanfed a Bever. Durant dus onns ha el studegià psicologia a l'universitad da Turitg. L'onn 1983 cumenza el sia lavur schurnalistica tar il Radio Rumantsch a Cuira, tgrira diversas emissiuns sco «Allegra» e «Buna Luna» e formulescha novitads da mintga di e da sport. Per la fin d'october va Niculin Bezzola en pensiun. Ma, el na dettia betg en ina fora, ha el sincerà envers l'anr. El salva ina pitschna incumbensa tar rtr, plinavant vul el far dapli sport e forsa cumenzar cun in nov studi. Ses successur è il giuven Adrian Camartin, oriund da Breil.



Niculin Bezzola è stà fitg satisfatg da sia funcziun sco redactor da rtr a Berna.